

Joãonẽ ha dukũ hatu kene bumanikiaki

1 JOÃO

Hãtxa kayabi hawẽ hiwei ikibi iti hayakiaki, na hãtxarã

1 ¹ Ë betsabu inũ ã puibuũ, ã matu kene bumai uĩrakãwẽ. Mai damiwariama Cristo hiweni natiã hiwea mã nĩkakubainairã, haskarã, nukũ dukũ hawẽ daya tateskĩ taewabainai nukubũ nũ nĩka taewabainiki. Hanushũ nukũ beruwẽ daiskĩ mekĩ hatũ nuku hiwekuĩmamis ha hãtxa hiwea haya nũ beiskubainiki. ² Ha hiwearã, hamebi hawa huneama ikũkainai nukũ uĩnishũ hakiri shabakabi txanikĩ hawẽ kaka matukiri hiwea ikibi ika haya nũ matu yuikubainai. Hawẽ Epabe dasia nuku shabakabi uĩmakubainai nukubũ nũ uĩkubainiki. ³ Ha kakape nukubũ uĩkĩ nũ nĩkanirã, Epa Deus inũ hawẽ bake Jesus Cristobe nũ hatube dasia keskariai maturi mã nukube dasirianũbũ nũ matuki txanikũkainai. ⁴ Nukubũ haskas nũ xinaĩ mã nukubetã ikũwaĩbukiri ibubis xinã txãkaĩ nũ benimatxakayamakubainũbũ na kaka pepa nũ matu keshunai.

**Jesus Cristõ nukũ txakabu buanishũ Deus nuku
daewashũkubainikiaki, na hãtxarã**

⁵ Deus dasibi shaba keska pepahairaki, hawa parananãti txakabu hayamarã. Jesus Cristõ na kaka pepa haskakiri nuku yusãĩ nũ nĩkani hanushũ habiasri yusĩ nũ matuki txanikũkainai. ⁶ Hakia tsuãra yuikĩ: “Ma ã Deuski dasiaki”, ibiakĩ txakabuwakubaini hiwea mã parananã bestiaii, txanima shabakabi hatu uĩmakĩ mawamamarã. ⁷ Hakia tsuãra Deusũ hãtxa ikũwãtã txibaĩ mã pepai hiweaburã, Deusũ shabaki mã ma pesea keskabuki. Haskawẽ taea nukubũ ikũwaĩbu nũ ma dasiabuki. Hanushũ txanima hawẽ bake Jesus Cristo nukuwẽ taea mawakĩ hawẽ himi habakĩ Deus nuku daewashũkĩ ma nukũ txakabu nuku bua keyushuniki.

⁸Hamē tsuāra ikūwābiakī hawē xinā kayabi unāma yuikī: “Eānā, ē hawa txakabuwaismaki”, iki bemakis besti xinākī nukūmebi ibubis nū paranātiruki, hātxa kayabi hayamarā. ⁹Hakia hau nukū txakabu nuku buashunū hawara mekī nū hatu mexu waxinaki dateama Deus inū tsuabura nū txakabuwaxina hau nīkanūbū shabakabi nū hatuki txaniaya Deus pepa nukuwē nuikī nukū txakabu buatā ana xināma nuku hakimawatiruki. ¹⁰Hakia tsuāra yuikī: “Ē hawa txakabuwaismaki”, ikī Deus txani txakai dabanē yurabū hawē hātxa nīka pewariama haska dasibibu nū txakabu hayabuwē taea nū haska yuitirubumaki.

2 ¹Ē bake keskabuū, Deusū hātxa txibākī mā ana txakabuwayamanūbū ē matu keneshū bumai nīkakāwē. Mā haskabia tsuāra kanekī mā txakabu meayarā, nukū hātashunika Jesus Cristo hawē Epa bebū nia nū hayaki, hatū hawa kanenimatū nuku merabewairā. ²Nuku besti ishuāma hakia mai hirabi anu hiwebaunabū txakaburi buanū ika Jesus Cristo mawakī hawē Epa nuku daewashuniki, txashuwā menukī inākī daewapaunibu keskakinā.

Ikūwāibu yunua benawē hawē hiwetikiaki, na hātstarā

³Ha Deusū yununi nū habuā txibākubainairā, nukubū nū ma unāti watā mestēwanā, txanima nū ma hanu haki dasiabuki. ⁴Hakia tsuāra yuikī: “Deus ē ma unaiī”, ibiakī hawē yunua hātxa txibāmarā, ha huni txani txakaikiki, Deusū hātxa txanima haki hayamawē taearā. ⁵Hamē tsuara xinā betsatā Deusū hātxa txibākī ashūkayabairā, txanima kayabi hawē shabakabi Deusū nui haya ha meranua tashnikiki. Hamē nukubu nū haskariaiburā, nū hakiri dasiabu nū ma unākanaii. ⁶Ha inū, tsuāra yuikī: “Ma Deuski dasia ē hiweaii”, ikirā, haska Jesus Cristo hiwekūkaini keskai hau iriakubainūbūwē.

⁷Ē betsabū inū ē puibuū, ē matuwē nuikī ha dukū Jesus Cristō nuku yununi bena ē betsa wamaki. Habias nukū betsabū matu yusīaibu mā nīkakī taewanirā, harā, mā ma nīkaniki. Xinaīrakāwē, mā abunamekubainūbunā. ⁸Habiaskabiakē na yunua bena keska wakī ana matu xināmakī ē matu keneshunaii. Ha dukū Deusū nuku yunukī: “Minabube abunamekubaīshākāwē”, iwanā, nuku yununiki. Haskakē haska Cristo nukuwē nuikī nuku abumis unākī yunua bena tashniai keska wakī ē ana matu xināmai. Matū hiwea sheni mā henekubirani ma txanima shaba kayabiki mā pesea keskabuki. Na mā haskai hiwearā, Cristō yununi kayabiki.

⁹Tsuāra yuikī: “Cristo ikūwāi ma ē hawē shaba hayaki”, ibiai ikūwāi betsa danaī habe dakekenaīnā, hawē hiwea sheni hene keyuriamā mexu merā hiwea keskayuaki. ¹⁰Hakia tsuāra hawē hātxa txibaī ikūwāi betsabube abunamemistrā, ana hawawē taea txītuāi txakabū kanemakī atxitirumaki. ¹¹Hamē tsuara ikūwāibube abunameama hatube danānanaī

dakekenainã, hawē hiwea pemawē taea mexu merã nia hani kai unãma keskaki. Ha mexu merã niarã, hawē hiwea shenĩ hawē xinã bepu keyua bekũ keska hiweaki.

¹² Ë bake keskabuũ, Jesus Cristõ hawē hiweawē nuku merabewanũ ika tashnitã nuku mawashuniwē taeshũ Epa Deusũ matũ txakabu buatã matu haibuwani xinãkĩ ã matu keneshunaii. ¹³ Epa bu inũ ewabuũ, Deusũ mai damiwariama hawē bake habe hiwekũkaini mã ma ikũwãkĩ unaĩwē taeshũ ã matu kene bumaii. Berunãbu inũ txipaxbuũ, Deusũ hãtxa txibãhairakĩ huĩtinĩ mestẽwãtã mã yushĩ txakabu Satanãs maemaiwē taeshũ ã matu kene bumaii.

¹⁴ Ë bake keskabuũ, mã ma Deus unãyanã, ã matu keneshunaii. Ha dikabi hawē bake habe hiwekũkaini mã ma ikũwãkĩ unaĩwē taeshũ ã matu kene bumaii. Berunãbu inũ txipaxbuũ, huĩtinĩ mestõtã mã ma Deusũ hãtxa nĩkatã txĩtuãma txibãkĩ hawē Satanãs mã ma maemawē taeshũ ã matu kene bumaii.

**Na mai anua mabuwē besti kemukĩ Deus
benimawatirubumakiaki, na hãtxarã**

¹⁵ Yurabu na mai anu hiweshũ haska abukĩ txakabu akaibu danaĩ ana hatube naxui itã ana abuyamakubaĩkãwē. Hamē betsabũ hatũ hiwea inũ hatũ beya txakabu mã abukubainairã, Epa Deus mã abuamaki, danãkinã. ¹⁶ Na mai anu yurabu hiweshũ akĩ tashnimaiburã, beya txakaburã, Deus anua huamaki. Haska huirã, yurabũ hatũ yura atimapawati bestiwē kemui inũ, hatũ beruwē besti mabu uĩkĩ haska abuai keska tashniai hawē besti kemui keĩ hiweabuki. ¹⁷ Hanua yurabũ haska xinãkĩ abiamisburã, hatũ kemu paerã, keyukũkainikiki. Hakia xinã betsa watã haska Deusũ abumis aki hiwekubainaiburã, habe hiwekuishãkanikiki, ikibi ikirã.

Cristoki sinatai tashnishanikiaki, na hãtxarã

¹⁸ Ë bake keskabuũ, ma bari hawē henei keyuikiki. Bari hawē heneaitiã huni shanẽ ibukĩ Jesus Cristo mebinũ ika haki sinatai haki beparamei hushanai mã nĩkanirã, na habiatiã itxapabu haki sinatai ha keska ma tashniaibu mã uĩaiĩ. Haskawē taeshũ ma bari hawē henei ma kemai mã unãtirubuki. ¹⁹ Habu tashnirã, nãtekea beama habia nuku anua iki taebaĩkanikiki. Nukube itxabiamisbu Jesus Cristo danaĩ ana nukube itxama haki sinatakanikiki. Hamē nukubetã ikũwaĩbunã, nuku pashkabainama itirubuki. Hakia nuku pashkabainaibu uĩkĩ ikũwã kayabiabuma mã shabakabi unãtirubuki.

²⁰ Jesus Cristo meribitũ hawenabu wakĩ ma matu pashkaniki, hawē Yushĩ Pepawenã. Haska dasibitũ mã ma hakiri hawē hãtxa txanima mã ma hayakẽ ana tsuã matu parãtirumaki. ²¹ Hanushũ mã hãtxa kayabi unãmawē taema hakia hãtxa kayabi mã unaĩwē taeshũ ã matu

keneshunaii. Cristo anua hãtxa txakabu tashniamaki. Hakia hãtxa kayabi besti hanua tashnikũkaĩmiski. ²²Hakia tsuabu ikanimẽkaĩ, Cristoki txani txakai parananaĩnã? Habu parananaĩki hakiri hãtxakĩ yui: “Jesusrã, Deusũ Katua Messiasmaki”, ikaiburã, ha hunĩ hawẽ kuxipa mebinũ ika haki beparamekĩ hawẽ Epa inũ hawẽ bakeki sinatakĩ hatuki dakekenanamemaikiki. ²³Haska inũ, tsuabura Deusũ bake danaĩ haki dakeirã, hawẽ Epa Deuskiri dakeriaikiki. Ha inũ, tsuabura dakeyamakã hakiri hãtxai peii: “Ë Jesus ikũwaiĩ”, ikĩ hawẽ Epakiri shabakabi wariaikiki.

²⁴Haskakẽ matunã, Deusũ hãtxa mã nĩka taewanirã, matũ huĩti merã ha kaka pepa mã mekea matuki ma dasia hanu hawẽ bake inũ hawẽ Epabe mã ma hatuki dasia hiwekũkaĩriashanaii. ²⁵Haska Jesus Cristõ ma nuku yubabaini nũ ma haya hawẽ taea hiwei ikibi ika nũ ipashanaii.

²⁶Ha habũ matu parãkatsis ikaibukiri ã matu keneshunaii. ²⁷Hakia txanima Deusũ Yushĩ Pepa Jesus Cristõ matu inãki ma matu meribi wani hatũ besti hawẽ yusã txanima hawa matu parãma yusiki matu merabewakubainaya ha parananaĩmĩsbũ hatũ hãtxawẽ matu yusitirubu hayamaki. Haskawẽ taea mã ma Jesus Cristoki dasiaturã, haska Deusũ Yushĩ Papatũ besti matu yusãĩ betsa wakĩ heneyamakubaikãwẽ.

²⁸Ë bake keskabuũ, natiã Jesus Cristoki dasitã heneyamakãwẽ, haki txiti ikirã, hanu ana nukuki nukui huaitiã damapai nũ haki datei daketirubumakirã, ha bebunuarã.

Deusũ bakebu haskaibu nũ unãtirukiaki, na hãtxarã

²⁹Txanima Jesus Cristõnã, hawa kaneama ini mã unaiĩ. Haskawẽ taea tsuabũra hawara Deusũ abuai akubainaiburã, pepabu Deusũ bakebu mã unãtirubuki.

3 ¹Xinãkãwẽ. Nukuburã, nukũ Epa Deusũ nuku abuhairakĩ nũ hawẽ bakebu nuku kenaikiki. Hakia tsuabũra Deus unãbumawẽ taeshũ nũ hawẽ bakebu nuku unãbumariki. ²Ë betsabu inũ ã puibuũ, ã matuwẽ nuairã, nũ ma Deusũ bakebuki. Txipu haskarara nũ ishanai natiã nũ unãriabumaki. Hakia nukũ Shanẽ Ibu Jesus Cristo ana nukuki nukuaitiã hanu habe ha keskari ikĩ hanu haskarara nuku wai nũ uishanaii. ³Na haska dasibi hakiri xinãki nũ manaiburã, nukũ xinã txakabu haki petxi nũ pepa bestikatsis ikĩ nũ benakanaii, Jesus Cristo pepani keskanũ ikarã.

⁴Tsuabũra txakabu meaiburã, habuã Deusũ hãtxa txibãma danãki txakabu ewawakanikiki, haska yunuti tibi hayabiakẽ txakabuwakĩ ha txibãmarã. ⁵Yurabũ txakabu buanũ ika Jesus Cristo na mai anu tashnitã Deusũ yunua kanei txakabuwama inirã, mã unaiĩ. ⁶Tsuabura nũ ma haki dasiaturã, nũ ma mestẽwã ana hawa txakabuwakubainamaki. Hakia tsuabũra txakabuwakubainairã, habuã Jesus haibuwakĩ unãriabuma ikubaikanikiki. ⁷Ë bake keskabuũ, hau tsuã matu parãyamanũ ã matu

yui ai nīkakāwē. Jesus Cristo pepa ikūkaini keskakī tsuāra txibākī pepa akubainairā, ha hunirā, hawē xinā pepariki. ⁸Hakia tsuāra txakabu akubainaiburā, Satanás txibākī akanikiki. Bebūkiri Satanásā Deus nīkama hatū dukūtū hakiri txakabuwanishū hatū hatu amakubainikiki. Haskawē taea Satanásā haska hatu amakubaīmis yamawakī keyunū ika Deusū bake tashniniki.

⁹Haratura nū ma Deusū bakeburā, nū ana txakabu mekubaītirubumaki, hawē hiweti xinā pepa ma nuku merā naneawē taearā. Haskawē taea nū Deusū bakebu nukūmebi nukū hiwea nū mekekubaītirubuki, ana txakabuwamarā. ¹⁰Deusū bakebu inū Satanásā bakebu mā unāti watirurā. Tsuāra pepa akubainama inū ikūwaībube abunameamarā, Deusunabumaki.

Betsabuwē nuikī hatu uīmatikiaki, na hātcharā

¹¹Jesus mā ikūwākī taewaya matu yusīkī: “Matubetā ikūwaībube nui hatube abunamekubaīkāwē”, ika hātcha mā nīkanirā, habiaskari ana ē matu xināmaai. ¹²Adāonē bake dabe inibukiri matu ana xināmanū nīkakāwē. Caimnē Satanásā xinā txibākī hawē betsa tenānikiaki. Haskarawē taeshū animē? Caimnē hawē hiwea pepamakē hawē betsa Deusū yunua aki pepaya haki sinatakī tenānikiaki. Caimnē hawē betsa Abel abuama ini keskariai nukuburā, haskayamakubainākāwē.

¹³Ē betsabū inū ē puibuū, habū ikūwābumā Deusū hātcha nīkama matu danaī matuki dakekenaībunā, hatu uī datei e iyamashākāwē. ¹⁴Uatiā nū abunameamarā, nū mawa keska inibuki. Na haska unākinā, natiā nukū betsabube nū abunameaiburā, nū hiwea hayaki. Hakia habu abunameabumarā, ma mawanibu keska hiweyuabuki. ¹⁵Tsuara ikūwaībū betsawē nuiama dakekenāmisrā, huni pubēki. Ha huni haskaburā, hamebi hatū hiwekuīa hayatiruma mā unaiī. ¹⁶Nū nui kayabi haya nū tapītirurā, haska Jesus Cristo nukuwē dabanā hawē hiwea nuku ināni nū xinātirubuki. Haskawē taea nukubūri nukū betsabū nū hatu abukayabiai nū hatu uīmatirubuki. ¹⁷Hakia tsuara mabuhairayatū ikūwaībū betsa nuitapai uībiai beru txākāshū hatu merabewama hawa inaīsmarā, hawa Deusū nui hayamaki. ¹⁸Ē bake keskabuū, txanima Deus abukī duawakinā, hātcha bestiwē akama ikūwaī betsabuwē nui merabenākī hatu uīmakī ashūkubainākāwē.

¹⁹Hamapai tibi kanebiakubaini nukunabube nū abunamemismwē taeshū Deusū nukū txakabu nuku buashuni nū unātirubuki. ²⁰Nū txakabu wakubaīmis nuku unā keyubiaya Deus nū yuka nukū txakabu nuku buashūtā ana xināma unai ana punu nukayamakubainākāwē. ²¹Ē betsabū inū ē puibuū, matuwē nuikī ē matu merabewairā, nukū txakabu nū ma pewa ana hawawē taea Deuski nū datetirubumaki. ²²Haskawē taeshū hawē hātcha txibākī haska abu ai akī nū benimawakubainai unā keyuaya

hanushū hawara bikatsis ikī Deus nū yuka nuku ashūshanikiki. ²³Hawē bake Jesus Cristo nū ikūwāshanūbū inū nū abunamekubainūbū Deusū hawē yunuti yununiki. Habias keskari hawē bakē nuku yunurianiki. ²⁴Tsuāra Deusū hātxa nū txibaiburā, nū haki dasia hiwea inū hari nukuki dasiria hiweriaki. Ha inū, hawē Yushī Pepa nuku yunua nū biniwē taeshū nukuki dasia hiwea nū unākanaii.

Haratura Deusū Yushī Pepa haya unātikiaki, na hātcharā

4 ¹Ē betsabu inū ē puibuū, matuwē nuikī na haska tashnibiranaibukiri ē matu yusīkatsis ikaii. Mai hirabi anu Deusū hātxa yuishunikaniapai habu txani txakaiburā, mirima hayaki. “Earī ē Deusū hātxa yuishunikaki”, ikaiburā, dasibi hatu ikūwāyamakāwē. Hakia hatu unāti wakinā, txanima habu Deusū Yushī haya ikanimēkaī? Hayamabia matxupai ikanimēkaī? Hatu uīkubaikāwē. ²Haskakiri hātxaibu mā unātiruburā, habu Deusū Yushī Pepa hayarā, habū ikūwākī yuikī: “Jesus Cristo tashnirā, yura kayabi bitā kainiki”, ikaibu Deusū Yushī Pepa haya mā unātirubuki. ³Hakia tsuāra Jesus Cristokiri unāmabia yuikī: “Yura kayabiana iniki”, ikaiburā, Deusū Yushī Pepa hayamaki. Ha hunī Jesus Cristo shanē ibu mebinū ika haki sinatai haki beparamei hushanai yushī hayaki. Haskakiri ha yushī hushanai mā nīkanirā, harā, ma na mai anu yurabu anu kaīma ma niaki.

⁴Ē bake keskabuū, mā Deusunaburā, hawē Yushī Pepa kuxipa mā hayawē taeshū Satanāsā hatu merabewabiamiskē ha parananaību mā hatu binu keyuaki. Satanās kuxipabiakē Deusū Yushī Pepa kuxipahairatū ma binuaki, matu merabewakinā. ⁵Ha yusinā parananaīburā, hatū yusiawē hātchairā, hatū beyakiri besti hātchakanikiki. Tsuabura habu keskabūri hatu nīkakanikiki. ⁶Hakia nukurā, nū Jesusū kuxipayaburā, nū Deusū bakebuki. Nū yusiayā habū Deus unākī nuku nīkaibū habū Deus unābumā nuku nīkaisbumaki. Ha haskaburā, haratura txanima Yushī Pepa haya inū haratura paranā yushī hayabu nū unātirubuki.

Ikūwā kayabiai unātirā, abunamei beyanamei hatuki dasiakiaki, na hātcharā

⁷Ē betsabu inū ē puibuū, nui pae Deus anua humiski. Haskawē taea tsuabura nū hawē bakebui ikaiburā, Deus unākī haibuwanikiki. Haskakē nukubu nui abunamekubainākāwē. ⁸Deus nuikipabiakē tsuāra ha abunameti xināmarā, Deus unāriabumaki. ⁹Jesus ikūwai hawē taea nū hiwea hayashanūbū Deusū hawē bake bestitxai yurabu anu yununiki, nukuwē nuikī nuku abuai nuku uīmakinā. ¹⁰Nuku abuai haska uīmakinā, nukū dukū nū Deus abuama iniki. Hakia nukuwē nuikī nuku abukinā, hawē bake yununiki, hau ha mawakī daewaiwē nukū txakabu buatā ana xināyamakubaīshanunā.

¹¹ Ë betsabu inũ ã puibuũ, ã matuwẽ nuikũkainairã, txanima nuku haska wakĩ Deusũ nuku abunikenã, nukuburi habiaskariai ikũwaĩ betsabube nui abunamekubainãkãwẽ. ¹² Tsuã Deus uĩpaunima inũ uĩtirumabiakẽ nukubu nũ abunameairã, Deus nukuki dasia nukube hiweaki. Nukube dasiawẽ taea ha nui txanima kayabi nũ hayaki. ¹³ Nukubu nũ Deuski dasia hiwea inũ ha nukube dasia hiwea hawẽ nũ unãti wakubainũbũ hawẽ Yushĩ Pepa nuku inãniki. ¹⁴ Txanima Epa Deusũ hawẽ bake hau yurabu mai hirabi anu hatu mekekubaĩshanũ yununi nukubũ uĩnishũ nũ shabakabi hakiri txanikũkaĩmiski. ¹⁵ Hamẽ tsuabũra yuikĩ: “Txanima Jesus Deusũ bake kayabiki”, ikaiburã, Deuski dasia hiweabu inũ Deus hatuki dasiriaki.

¹⁶ Txanima Deus nũ abuirã, ikũwãkĩ nũ ma Deus unãkanaii. Deusrã, nuikipa abunamenikaki. Tsuara ha nui haya hiwearã, Deuski dasia hiweaki, Deusri haki dasiriarã. ¹⁷ Haskakũkaini txanima nũ nui hayakũkaĩmisburã, Deusũ Jesus Cristo abumis keska wakĩ nukuri habiaskari wakĩ nuku abumiswẽ taea hanu bari hawẽ heneaitiã Deusũ hatu unãti waya nũ hawa dateama ishanaii. ¹⁸ Hanira hanu nui hayarã, hanu date hayamaki. Tsuara nui kayabi hayarã, ikũwaĩbuwẽ nui abunamekayabikĩ hawẽ date putamisbuki. Hamẽ betsa date hayarã, hawẽ kupiti xinãmisbuki. Haskawẽ taea tsuara datekeparã, nui kayabi pae haki nukuriamaki.

¹⁹ Deusũ dukũ nuku abukĩ taewanikẽ hawẽ taea nukuri nũ hatube abunametiruki. ²⁰ Haratura ikũwaĩ betsa habe ikũwaĩ habe uĩnanãbiai habe abunameamarã, habiaskariai Deus nũ uĩyamaberi abunametirubumaki. Haskawẽ taea tsuãra yuikĩ: “Deus ã abuaii”, ibiai samama ikũwaĩbu betsa danaĩ habe dakekenaĩnã, ha huni txani txakaikiki. ²¹ Jesus Cristõ nuku yunukinã, eska yuiniki: “Tsuãra Deus abukinã, matubetã ikũwaĩburi hatuwẽ nuikĩ aburiakubaĩkãwẽ”, nuku waniki.

Ha ikũwãtirã, nui kayabi hayakiaki, na hãtxarã

5 ¹ Tsuabũra Jesus ikũwãkĩ yuikĩ: “Txanima Jesus Deusũ Messiaski”, akĩ yuiaiburã, Deusũ bakebuki. Ha inũ, tsuãra Epa Deus abuirã, Deusũ bake betsaburi aburiaikiki. ² Epa Deus abukĩ haska yununi nũ txibaĩburã, Deusũ bakebu nũ hatube abunameai nũ unaii. ³ Deus nũ abuirã, hawẽ yunuti inũ hawẽ nemati nũ txibãkubainaii. Hawẽ yunuti txibaĩnã, shãkamama bikamaki. ⁴ Nũ tsuabura Deusũ ma hawẽ bakebu nuku wa tsuabũra hatũ hiwea txakabu txibãkĩ Deus danaĩbu nũ hatu maemaii. Nũ Jesus ikũwaĩwẽ taeshũ hawẽ kuxipayakĩ ha yurabũ txakabu akaibu nũ ma hatu binuaki. ⁵ Hanushũ: “Jesus Deusũ bakeki”, akĩ tsuãra ikũwãkĩ yuikinã, habu bestitũ Deus danaĩbu hatu binukanikiki.

⁶ Jesus Cristo tashnikiranã, eskakĩ dasibi hatu unãti wamakĩ kayatiwamaniki, ha dukũ henuwẽ ikaibu anu hari naxirã, hanua dasibibũ berubiri cruzkia

dunua hawē himi habakī hatu uĩmakinā. Henewē naxi bestiama hakia mawai hawē himi habakī hatu unāti wamaniki. Haskanirā, Deusū Yushī Papatunā, hamebi unaĩkiki. Haska unāi nukukia txanima txanimiski. ⁷Ha Jesus haskani habu txaniairā, eskaki. Hawē unāmati dabe inū besti txaniti hayaki, ⁸Yushī Peparā, henewē naxinirā, mawai himi habanirā. Habu dabe inū bestirā, hatū xinānā, habiaskas xinā kanemaki. ⁹Hawara kaka yurabū beshū yuiaiburā: “Txanimaki”, ishū nū hatu nĩkamiski. Hamē Deusū ibubis hawē bake kayabikiri nukuki txanikī ha kaka tashnimanirā, yurabū kaka yuimisu keskama ha binua mestenepahairaki. ¹⁰Tsuāra Deusū bake ikūwaĩnā, hamebi hawē huĩti merā ha kaka haya yuimaki shabakabi wamaikiki. Hakia tsuāra Deus ikūwāmatunā: “Deusrā, txaniki”, ikī hatu xināmamiski, ha txanitxakakinā, Deus ibubis hawē bakekiri txanini ikūwāmarā. ¹¹Ha inū, Deus txani: “Hiwea ikibi ika ē matu ināshanaii”, inirā, ha hiwearā, hawē bake anu hayaki. ¹²Ha inū, tsuāra Deusū bakeki ma dasikī ikūwaĩburā, ha hiwea ikibi ika hayaki. Hamē tsuara Deusū bakeki dasikī ikūwāmarā, ha hiwekuĩa hayabumaki.

Nui hātxa hawē heneakiaki, na hātcharā

¹³Jesus Deusū bake mā ikūwaĩbu na yusā ē matu keneshunaii, Deusbe mā hiwei ikibi ika mā ma haya mā unānūbunā.

¹⁴Haska Deusū xināi keska xināki hawara nū yukai nuku nĩkamis dateama nū unāi. ¹⁵Nū habe hātchakī yukai Deusū ma nuku nĩkatā hawara nū ma yuka nuku ināshanai nū unāi. ¹⁶Ha inū, txakabu dabe hayaki. Ha txakabu daberā, betsa Deusū buakatsis ikikiki. Bestitxai buakatsi ikamarā, mawa kayabi anu katiruki, Jesus mawabiashuni danāki txakabu wamistrā. Haskawē taeshū ikūwaĩ betsa hawara txakabu Deusū abuama ana akai uĩtā mā merabewakatsis ikairā, hau Deusū kupiyamashanū xinā pewamakī merabewakī matū betsa Deus yukashūkawē. Hamē betsāri haska Deusū hawē txakabu buashūkatsi ikama uĩbiakī Deusbe hātchashūyamakawē, hawē hiwea ma kupiti hayakirā. ¹⁷Hawara txakabu tibi danāki Deusū abuisimaki. Abuisimabia betsa betsapa hatū hiwekuĩa benumakatsis ikama hatu buashūmiski.

¹⁸Tsuāra ikūwāki Deus hawē Epa wai ma haki dasiarā, ana txakabu mekubaĩtiruma nū unāi, Deusū bake Jesusū mekekubainayarā. Ha dikabi Satanāsā yunukī ikūwaĩbu kanematirumaki. ¹⁹Satanāsā mai hirabi anu hiweabu hatu parā keyuikiki. Hamē nukurā, nū Deusū bakebu nū unāriaii. ²⁰Deusū bake tashnitanā, hamē huama Deus hiwemanika kayabi nū unāshanūbū hawē unānepa nuku inanū ika huni nū unāi. Nū ma ha txanima kayabiki dasia hiweaburā, harā, hawē bake Jesus Cristoki nū ikaki, habias Deus mekenika kayabitū hiwei ikibi ika nuku ināmisrā.

²¹Ē bake keskabuū, yushī dami kēwāmisbu beyanu ha dapi ana buyamakubaĩkawē.

Hatiski, ē hātcharā.

João